

Na osnovu člana 15. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09), člana 71, 124. i 125. Statuta Općine Vogošća („Službene novine Kantona Sarajevo“, broj: 27/14 - Prečišćeni tekst i broj: 14/15, 9/20 i 23/24), člana 171. Zakona o socijalnoj zaštiti, zaštiti civilnih žrtava rata, zaštiti porodice sa djecom („Službene novine Kantona Sarajevo“, broj: 38/14 – Prečišćeni tekst, 38/16, 44/17, 28/18, 52/21, 40/22 i 13/25), Zakona o osnovama socijalne zaštite, zaštite civilnih žrtava rata i zaštite porodice sa djecom („Službene novine Federacije BiH“, broj: 36/99, 54/04, 39/06, 14/09, 45/16, 40/18 i 16/23), Odluke o izvršavanju Budžeta Općine Vogošća za 2025. godinu („Službene novine Kantona Sarajevo“, broj: 1/25), Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj: 37/24) i Odluke Općinskog načelnika o načinu primjene smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine, Općinski načelnik Općine Vogošća, donosi:

P R A V I L N I K
o kriterijima i raspodjeli novčanih sredstava za dodjelu
jednokratne novčane pomoći licima u stanju socijalne potrebe sa područja općine Vogošća

Član 1.
(Predmet)

Ovim Pravilnikom o kriterijima i raspodjeli novčanih sredstava za dodjelu jednokratne novčane pomoći licima u stanju socijalne potrebe sa područja općine Vogošća (u daljem tekstu: Pravilnik) uređuju se kriteriji i način ostvarivanja jednokratne novčane pomoći licima koja se nalaze u stanju socijalne potrebe sa područja općine Vogošća.

Član 2.
(Cilj)

Cilj pružanja jednokratne novčane pomoći je ublažiti trenutno stanje socijalne potrebe u kome se našao pojedinac, odnosno porodica.

Član 3.
(Korisnici socijalne zaštite po Federalnom zakonu)

Na osnovu Zakona o osnovama socijalne zaštite, zaštite civilnih žrtava rata i zaštite porodice sa djecom, korisnici socijalne zaštite su lica koja se nalaze u stanju socijalne potrebe i to:

- 1) djeca bez roditeljskog staranja;
- 2) odgojno zanemarena djeca;
- 3) odgojno zapuštena djeca;
- 4) djeca čiji je razvoj ometen porodičnim prilikama;
- 5) lica sa invaliditetom i lica ometena u fizičkom i psihičkom razvoju;
- 6) materijalno neosigurana i za rad nesposobna lica;
- 7) stara lica bez porodičnog staranja;
- 8) lica sa društveno negativnim ponašanjem;
- 9) lica i porodice u stanju socijalne potrebe kojima je uslijed posebnih okolnosti potreban odgovarajući oblik socijalne zaštite.

Član 4.
(Stanje socijalne potrebe po Federalnom zakonu)

Lice odnosno porodica u stanju socijalne potrebe, kojima je uslijed posebnih okolnosti potreban odgovarajući oblik socijalne zaštite, u smislu navedenog člana 12. tačka 9) iz člana 3. Pravilnika smatra se lice, odnosno porodica koja se nađe u stanju socijalne potrebe zbog pretrpljene prisilne migracije, repatrijacije, elementarne nepogode, smrti jednog ili više članova porodice, povratka sa liječenja, otpuštanja sa izdržavanja kazne zatvora ili izvršavanja odgojne mjere.

Član 5.
(Socijalna potreba, korisnici socijalne zaštite i zajedničko domaćinstvo po Kantonalnom zakonu)

- 1) Socijalnom potrebom u smislu Zakona smatra se trajno ili privremeno stanje u kome se nalazi građanin ili porodica, prouzrokovano ratnim događajima, elementarnim nesrećama, općom ekonomskom krizom, psihofizičkim stanjem pojedinaca ili drugih razloga, koje se ne mogu otkloniti bez pomoći drugog lica.
- 2) Osobe i porodice koje se nađu u stanju socijalne potrebe iz razloga koji nisu propisani Federalnim zakonom, na osnovu mišljenja stručnog tima Službe, mogu ostvariti pravo na jednokratnu ili izuzetnu novčanu pomoć na osnovu Zakona o socijalnoj zaštiti, zaštiti civilnih žrtava rata i zaštiti porodice sa djecom.
Na osnovu Zakona o socijalnoj zaštiti, zaštiti civilnih žrtava rata i zaštiti porodice sa djecom korisnici socijalne zaštite, pored korisnika utvrđenih Federalnim zakonom su i:
 - osobe i porodice koje bi svoju socijalnu sigurnost trebale ostvariti od primanja, a ta primanja nisu dovoljna za podmirenje njihovih osnovnih životnih potreba;
 - osobe izložene zlostavljanju i nasilju u porodici.
- 3) Zajedničko domaćinstvo je ekonomska zajednica jedne ili više porodica u kojoj se zajednički stiču i troše novčana i druga materijalna sredstva stečena radom i korištenjem zajedničkih materijalnih dobara.

Član 6.
(Nadležnost)

Poslove u vezi ostvarivanja prava propisanih ovim Pravilnikom obavlja općinska Služba za boračko-invalidsku i socijalnu zaštitu.

Član 7.
(Sredstva)

- 1) Sredstva za dodjelu jednokratne novčane pomoći licima u stanju socijalne potrebe utvrđuju se u Budžetu Općine Vogošća (u daljem tekstu: Budžet Općine) za svaku kalendarsku godinu.
- 2) Raspodjela novčanih sredstava za ove namjene vršit će se u skladu sa raspoloživim sredstvima u Budžetu Općine za ove namjene.

Član 8.
(Javni poziv i potrebna dokumentacija)

- 1) Sredstva sa budžetske pozicije predviđena za ove namjene dodjeljuju se na osnovu Javnog poziva koji se objavljuje na web stranici Općine i ostaje otvoren do kraja tekuće kalendarske godine odnosno do utroška planiranih budžetskih sredstava.
- 2) Jednokratna novčana pomoć utvrđena ovim Pravilnikom dodijeljivat će se na osnovu podnesenih zahtjeva, a u skladu sa objavljenim javnim pozivom.
- 3) Zahtjevi za ostvarivanje prava podnose se Službi za boračko-invalidsku i socijalnu zaštitu.

- 4) Zahtjevi će se rješavati po redoslijedu podnošenja.
- 5) Dokumentacija koju je potrebno priložiti uz zahtjeve po objavljenom Javnom pozivu biti će navedena u posebnom obrascu koji će biti sastavni dio Javnog poziva.

Član 9.
(Uslovi ostvarivanja prava na jednokratnu novčanu pomoć)

Pravo na jednokratnu novčanu pomoć mogu ostvariti lica u stanju socijalne potrebe uz ispunjavanje sljedećih uslova:

- 1) da je podnosilac zahtjeva državljanin Bosne i Hercegovine;
- 2) da podnosilac zahtjeva ima prebivalište na području općine Vogošća najmanje 1 (jednu) godinu neposredno prije podnošenja zahtjeva za dodjelu jednokratne novčane pomoći;
- 3) da je lice, odnosno porodica u stanju socijalne potrebe definisano čl. 4. i 5. ovog Pravilnika;
- 4) da niko od članova porodičnog domaćinstva podnosioca zahtjeva nije vlasnik preduzeća ili samostalne radnje ili ima registrovanu dopunsku djelatnost;
- 5) da niko od članova domaćinstva podnosioca zahtjeva nije ostvario drugi vid jednokratne novčane pomoći putem Službe za boračko-invalidsku i socijalnu zaštitu.

Član 10.
(Pravo na ostvarivanje jednokratne novčane pomoći)

Jednokratnu novčanu pomoć u skladu sa ovim Pravilnikom mogu ostvariti lica u stanju socijalne potrebe i to:

- 1) Pojedinci ili domaćinstva koji nemaju nikakvih prihoda ili;
- 2) Pojedinci ili domaćinstva kojima ostvareni mjesečni prihod ne prelazi iznos od 40% prosječne plaće ostvarene u Kantonu Sarajevo u prethodnoj godini u skladu sa važećom Instrukcijom o iznosima novčanih davanja po Zakonu o socijalnoj zaštiti, zaštiti civilnih žrtava rata i zaštiti porodice sa djecom.

Član 11.
(Visina prihoda)

Ukupni prihodi domaćinstva kao uslov za ostvarivanje prava po ovom Pravilniku čine prihodi koji članovi domaćinstva ostvaruju po osnovu:

- 1) Plaće i drugih primanja, izuzev naknade za topli obrok, naknade za prijevoz na posao i sa posla;
- 2) Starosne, invalidske i porodične penzije;
- 3) Poljoprivredne djelatnosti;
- 4) Prianja po propisima iz boračko-invalidske i socijalne zaštite civilnih žrtava rata;
- 5) Prianja po osnovu socijalne zaštite, izuzev primanja po osnovu novčane naknade za pomoć i njegu od strane druge osobe i dodatka za njegu i pomoć od druge osobe;
- 6) Prianja po osnovu prava na ličnu invalidninu po svim osnovama, izuzev u postupku ostvarivanja prava na stalnu novčanu pomoć, novčanu naknadu za pomoć i njegu od druge osobe i dodatka za njegu i pomoć od druge osobe;
- 7) Prihoda ostvarenih po osnovu imovinskih prava;
- 8) Prihoda ostvarenih po osnovu autorskih prava;
- 9) Prihoda ostvarenih po osnovu privrednih, uslužnih i drugih djelatnosti;
- 10) Prihoda po osnovu registrovane dopunske djelatnosti.

Član 12.
(Postupak za ostvarivanje prava)

- 1) Postupak za dodjelu jednokratne novčane pomoći provodi Komisija imenovana od strane općinskog Načelnika.
- 2) Općinski načelnik imenuje Komisiju za pregled prispjelih zahtjeva po osnovu Javnog poziva iz člana 8. ovog Pravilnika.
- 3) Komisija će u svakom konkretnom slučaju, iznos odobrenih novčanih sredstava utvrditi na osnovu socijalno materijalnog statusa podnosioca zahtjeva, članova porodičnog domaćinstva, zdravstvenog stanja podnosioca odnosno članova zajedničkog domaćinstva.
- 4) Nakon što Komisija utvrdi da su ispunjeni uslovi propisani ovim Pravilnikom, Općinski načelnik putem nadležne Službe donosi Rješenje o ostvarivanju prava.
- 5) Zahtjevi koji ne ispunjavaju propisane uslove za dodjelu novčanih sredstava, kao i zahtjeve podnesene nakon utroška sredstava predviđenih za jednokratnu novčanu pomoć za lica u stanju socijalne potrebe, odbijaju se Zaključkom Općinskog načelnika putem nadležne Službe, a na prijedlog Komisije.
- 6) Protiv Zaključka iz stava 4. i 5. ovog člana može se izjaviti žalba Drugostepenoj stručnoj komisiji Općinskog vijeća u roku od 15 dana od dana prijema Zaključka.
- 7) Podneseni zahtjev važi samo za kalendarsku godinu u kojoj je zahtjev podnešen.

Član 13.
(Isplata jednokratne novčane pomoći)

Isplata jednokratne novčane pomoći za lica u stanju socijalne potrebe dodjeljivat će se isplatom na transakcijski račun podnosioca zahtjeva putem Službe za budžet i finansije.

Član 14.
(Visina jednokratne novčane pomoći)

- 1) Jednokratna novčana pomoć se dodjeljuje najviše do visine 20% prosječne neto plaće ostvarene u Kantonu Sarajevo u prethodnoj godini, a u skladu sa važećom Instrukcijom o iznosima novčanih davanja po Zakonu o socijalnoj zaštiti, zaštiti civilnih žrtava rata i zaštiti porodice sa djecom.
- 2) Izuzetna novčana pomoć se dodjeljuje do visine 40% prosječne neto plaće ostvarene u Kantonu Sarajevo u prethodnoj godini, a u skladu sa važećom Instrukcijom o iznosima novčanih davanja po Zakonu o socijalnoj zaštiti, zaštiti civilnih žrtava rata i zaštiti porodice sa djecom.

Član 15.
(Izuzetna novčana pomoć)

- 1) Osobi koja se nađe u stanju izuzetne socijalne potrebe može se dodijeliti izuzetna novčana pomoć.
- 2) Izuzetna socijalna potreba je potreba koja se ne može zadovoljiti jednokratnom novčanom pomoći.


Član 16.
(Stupanje na snagu Pravilnika)

Ovaj Pravilnik stupa na snagu narednog dana od dana objave na Oglasnoj ploči i web stranici Općine Vogošća.

Član 17.
(Prestanak)

Stupanjem na snagu ovog Pravilnika, prestaje da važi Pravilnik o uslovima, načinu i kriterijima za odobravanje jednokratne novčane pomoći licima u stanju socijalne potrebe sa područja općine Vogošća, broj: 09-31-212/23 od 25.01.2023. godine.

Broj: 09-31-1238/25
Vogošća, 13.06.2025.godine


OPĆINSKI NAČELNIK

Migdad Hasanović